

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সংবাদ, সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৭২/২০১৭-১৮

ঢাকা, মঙ্গলবার ১০ অক্টোবর ২০১৭, ২৫ আশ্বিন ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। উন্নয়ন ত্বরান্বিত করতে জাতীয় স্বার্থকে প্রাধান্য দিতে হবে : রাষ্ট্রপতি
- ২। মায়ানমারের ওপর আন্তর্জাতিক চাপ অব্যাহত রাখার আহ্বান
কূটনীতিকদের সঙ্গে পররাষ্ট্রমন্ত্রীর বৈঠক
- ৩। মায়ানমার সেনা কর্মকর্তাদের বিরুদ্ধে শাস্তির কথা বিবেচনা করছে ইইউ ও যুক্তরাষ্ট্র
- ৪। রোহিঙ্গাদের কলেরা টিকাদান কর্মসূচি আজ শুরু হচ্ছে : স্বাস্থ্যমন্ত্রী
- ৫। কর্ণফুলী টানেল নির্মাণে চীনা অর্থছাড়ে জটিলতা নেই : সেতুমন্ত্রী
- ৬। ওয়াশিংটনে বিশ্বব্যাপক সম্মেলন : রোহিঙ্গা সংকটে অনুদান চাইবে বাংলাদেশ
- ৭। বিশ্ব মানসিক স্বাস্থ্য দিবস আজ : রাষ্ট্রপতি ও প্রধানমন্ত্রীর বাণী
- ৮। রাশিয়া ও বাংলাদেশ সুপ্রিম কোর্টের মধ্যে সহযোগিতা চুক্তি স্বাক্ষর
- ৯। মেডিকেল কলেজে ভর্তির ফল প্রকাশ
- ১০। মাছের মূল্যস্তরে নীরব বিপ্লব : এফএও'র প্রতিবেদন
- ১১। তিন সন্তানসহ জঙ্গি মারজানের বোনের আত্মসমর্পণ

১। **উন্নয়ন ত্বরান্বিত করতে জাতীয় স্বার্থকে প্রাধান্য দিতে হবে : রাষ্ট্রপতি**

দেশের উন্নয়ন ও অগ্রগতি বেগবান করতে জাতীয় স্বার্থকে প্রাধান্য দিতে দলমতনির্বিশেষে সবার প্রতি আহ্বান জানিয়েছেন রাষ্ট্রপতি মো. আবদুল হামিদ। গতকাল (৯ অক্টোবর সোমবার) কিশোরগঞ্জের বাজিতপুর কলেজের সুবর্ণজয়ন্তী উপলক্ষে আয়োজিত এক অনুষ্ঠানে তিনি এ আহ্বান জানান। তিনি বলেন, দেশের সামাজিক, রাজনৈতিক ও অর্থনৈতিক উন্নয়নের জন্য স্থিতিশীলতা অত্যন্ত জরুরি। কারণ স্থিতিশীলতা দেশের অগ্রগতিকে গতিশীল করে। সাধারণ মানুষের আশা-আকাঙ্ক্ষা পূরণে সমাজের প্রতিটি স্তর থেকে দুর্নীতি দূর করার ওপর গুরুত্বারোপ করেন রাষ্ট্রপতি। সূত্র-ইত্তেফাক (শেষ পৃ.,ক.১), বণিক বার্তা (পৃ.২,ক.৪), ফিনানশিয়াল এক্সপ্রেস (পৃ.৩,ক.৬), অবজারভার (পৃ.৩,ক.২)।

২। **মায়ানমারের ওপর আন্তর্জাতিক চাপ অব্যাহত রাখার আহ্বান**

কূটনীতিকদের সঙ্গে পররাষ্ট্রমন্ত্রীর বৈঠক

রোহিঙ্গা সমস্যা নিয়ে মায়ানমারের মন্ত্রীর সঙ্গে দ্বিপক্ষীয় আলোচনার এক সপ্তাহ পরও রাখাইনে রোহিঙ্গাদের ওপর মায়ানমার সেনাবাহিনীর নৃশংসতা থামেনি। ফলে রাখাইন রাজ্যের সংখ্যালঘু রোহিঙ্গাদের বাংলাদেশে আসার ঢল অব্যাহত আছে। তাই রোহিঙ্গা সমস্যার শান্তিপূর্ণ সমাধান না হওয়া পর্যন্ত আন্তর্জাতিক সম্প্রদায়কে মায়ানমারের ওপর চাপ অব্যাহত রাখার আহ্বান জানিয়েছে বাংলাদেশ। গতকাল (৯ অক্টোবর সোমবার) ঢাকায় কর্মরত বিভিন্ন দেশের কূটনীতিকদের পররাষ্ট্রমন্ত্রী আবুল হাসান মাহমুদ আলী এ আহ্বান জানান। ২৮ দেশের কূটনীতিকদের এই ব্রিফিংয়ের শুরুতে মন্ত্রী সর্বশেষ পরিস্থিতি ব্যাখ্যা করে বক্তৃতা দেন। এসময় তিনি তাঁদের বলেন, দ্বিপক্ষীয় প্রক্রিয়াকে ফলপ্রসূ করতে হলে সমস্যা সমাধান না হওয়া পর্যন্ত আন্তর্জাতিক সম্প্রদায়কে তাদের পদক্ষেপগুলো অব্যাহত রাখতে হবে। গত ২ অক্টোবর সোমবার মায়ানমারের স্টেট কাউন্সিলর দপ্তরের মন্ত্রী চ টিন্ট সোয়ের সঙ্গে রোহিঙ্গা সমস্যা নিয়ে আলোচনা প্রসঙ্গে পররাষ্ট্রমন্ত্রী কূটনীতিকদের জানান, রাখাইনের রোহিঙ্গাদের নাগরিকত্ব যাচাইয়ের ক্ষেত্রে ১৯৯২ সালের যৌথ বিবৃতিকে ভিত্তি হিসেবে গ্রহণের প্রস্তাব দেয় মায়ানমার। বাংলাদেশ মনে করে, ১৯৯২ সালের পরিস্থিতি আর এবারের পরিস্থিতি এক নয়। তেমনি চ্যালেঞ্জও আলাদা। তাই ১৯৯২ সালের সমঝোতা অনুযায়ী রোহিঙ্গাদের ফেরত পাঠানো এখন বাস্তবসম্মত ও গ্রহণযোগ্য নয়। সূত্র-ভোরের কাগজ (পৃ.১,ক.১), অবজারভার (পৃ.১,ক.২), সমকাল (পৃ.১,ক.১)। প্রথম আলো, ডেইলি স্টার, নিউজ টুডে এ বিষয়ে লিড নিউজ ছেপেছে।

৩। **মায়ানমার সেনা কর্মকর্তাদের বিরুদ্ধে শাস্তির কথা বিবেচনা করছে ইইউ ও যুক্তরাষ্ট্র**

মায়ানমারের রাখাইন রাজ্যে সেনা অভিযানে রোহিঙ্গাদের নিধনের ঘটনায় দেশটির সেনাবাহিনীর কমান্ডার ইন চিফ ও বেশ কয়েকজন শীর্ষ জেনারেলের বিরুদ্ধে নিষেধাজ্ঞা ও শাস্তিমূলক পদক্ষেপের বিবেচনা করছে ইউরোপীয় ইউনিয়ন (ইইউ) ও যুক্তরাষ্ট্র। এছাড়া রাখাইনে রোহিঙ্গাদের বাড়িঘরে অগ্নিসংযোগে জড়িত বৌদ্ধ সশস্ত্র গ্রুপগুলোর নেতাদের বিরুদ্ধেও টার্গেট নিষেধাজ্ঞা আরোপের বিবেচনা করছে যুক্তরাষ্ট্র। এই নিষেধাজ্ঞা জারি করা হলে যুক্তরাষ্ট্রে থাকা সংশ্লিষ্টদের সম্পত্তি ব্যবহারে বিধিনিষেধ, যুক্তরাষ্ট্রে সংশ্লিষ্টদের ভ্রমণ ও তাদের সঙ্গে মার্কিনীদের ব্যবসায়িক লেনদেন নিষেধাজ্ঞাসহ নানা বিষয়ে কড়াকড়ি আরোপ করা হতে পারে বলে বার্তা সংস্থা রয়টার্সের এক প্রতিবেদনে প্রকাশ। সূত্র-সংবাদ (পৃ.১,ক.৭), ফিনানশিয়াল এক্সপ্রেস (পৃ.১,ক.৬), এশিয়ান এজ (পৃ.১,ক.৫)। যুগান্তর এ বিষয়ে লিড নিউজ ছেপেছে।

৪। **রোহিঙ্গাদের কলেরা টিকাদান কর্মসূচি আজ শুরু হচ্ছে : স্বাস্থ্যমন্ত্রী**

স্বাস্থ্য ও পরিবার কল্যাণ মন্ত্রী মোহাম্মদ নাসিম বলেছেন, শান্তি ও উন্নয়নের জন্য শেখ হাসিনা মাদার অব হিউম্যানিটি খ্যাতি অর্জন করেছেন। রোহিঙ্গা সমস্যা সমাধানে তিনি ৫ দফা প্রস্তাবনা দেওয়ায় আজ বিশ্বনেতৃবৃন্দও এগিয়ে এসেছেন। গতকাল (৯ অক্টোবর সোমবার) স্বাস্থ্য মন্ত্রণালয়ের সভাকক্ষে আয়োজিত সংবাদ

সম্মেলনে তিনি এ কথা বলেন। স্বাস্থ্যমন্ত্রী বলেন, মায়ানমারের দমন-পীড়নের মুখে বাংলাদেশে আশ্রয় নেওয়া রোহিঙ্গাদের কলেরা টিকাদান কর্মসূচি আজ ১০ অক্টোবর মঙ্গলবার শুরু হচ্ছে। প্রথম দফায় ১০ অক্টোবর থেকে ১৬ অক্টোবর পর্যন্ত এক বছরের উর্ধ্ব সবাইকে অর্থাৎ প্রায় ৬ লাখ ৫০ হাজার শিশুকে কলেরার টিকা দেওয়া হবে। দ্বিতীয় দফায় চলবে ৩১ অক্টোবর থেকে ৫ নভেম্বর পর্যন্ত, যেখানে ১ থেকে ৫ বছর বয়সী দুই লাখ ৫০ হাজার রোহিঙ্গা শিশুকে কলেরার টিকা খাওয়ানো হবে। সূত্র-ইত্তেফাক (শেষ পৃ.,ক.৫), এশিয়ান এজ (শেষ পৃ.,ক.১), অবজারভার (শেষ পৃ.,ক.২)।

৫। কর্ণফুলী টানেল নির্মাণে চীনা অর্থছাড়ে জটিলতা নেই : সেতুমন্ত্রী

সড়ক পরিবহণ ও সেতুমন্ত্রী ওবায়দুল কাদের বলেছেন, কর্ণফুলী টানেল নির্মাণে চীন থেকে অর্থছাড় নিয়ে জটিলতা নেই। বিদেশি ঋণের অর্থছাড়ে কিছু প্রক্রিয়া থাকে, অর্থছাড়ের বিষয়টি তাদের প্রক্রিয়াগত ব্যাপার। তিনি গতকাল (৯ অক্টোবর সোমবার) পতেঙ্গায় কর্ণফুলী টানেলের কাজের অগ্রগতি পরিদর্শনে গিয়ে সাংবাদিকদের এ কথা বলেন। মন্ত্রী আরো বলেন, প্রায় সাড়ে ৮ হাজার কোটি টাকা ব্যয়ে এ টানেল নির্মাণের কাজ চলতি বছরের মাঝামাঝি সময়ে শুরু হয়েছে। এটি নির্মাণের সময়সীমা চার বছর নির্ধারণ করা হয়েছে। সূত্র-ইত্তেফাক (শেষ পৃ.,ক.৫), বণিক বার্তা (পৃ.২,ক.১), অবজারভার (পৃ.১,ক.৫)।

৬। ওয়াশিংটনে বিশ্বব্যাংক সম্মেলন : রোহিঙ্গা সংকটে অনুদান চাইবে বাংলাদেশ

আগামীকাল থেকে যুক্তরাষ্ট্রের রাজধানী ওয়াশিংটন ডিসিতে শুরু হচ্ছে বিশ্বব্যাংক-আইএমএফের পাঁচ দিনব্যাপী বার্ষিক সম্মেলন। সম্মেলনে যোগ দিতে ইতোমধ্যে অর্থমন্ত্রীর নেতৃত্বে একটি উচ্চপর্যায়ের প্রতিনিধিদল যুক্তরাষ্ট্রে পৌঁছেছেন। সম্মেলনে চলতি রোহিঙ্গা সংকট মোকাবিলায় বিশ্বব্যাংক ও আইএমএফের কাছে অনুদান চাইবে বাংলাদেশ। সূত্র-সংবাদ (পৃ.১,ক.৮)।

৭। বিশ্ব মানসিক স্বাস্থ্য দিবস আজ : রাষ্ট্রপতি ও প্রধানমন্ত্রী বাণী দিয়েছেন

আজ ১০ অক্টোবর মঙ্গলবার বিশ্ব মানসিক স্বাস্থ্য দিবস। মানসিক রোগ সম্পর্কে গণসচেতনতা সৃষ্টির লক্ষ্যে বিশ্ব স্বাস্থ্য সংস্থা'র সিদ্ধান্ত অনুযায়ী ১৯৯২ সাল থেকে প্রতি বছর এ দিনে দিবসটি পালিত হয়। বিশ্বের অন্যান্য দেশের মতো বাংলাদেশেও দিবসটি উদ্‌যাপিত হচ্ছে। এ বছর দিবসটির প্রতিপাদ্য 'কর্মস্থলে মানসিক স্বাস্থ্য'। দিবসটি উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। রাষ্ট্রপতি তাঁর বাণীতে কুসংস্কার দূর করে তৃণমূল পর্যায়ে জনগণের মানসিক স্বাস্থ্যসেবা নিশ্চিত করতে সংশ্লিষ্ট সবাইকে অধিকতর দায়িত্বশীল ভূমিকা পালনের আহ্বান জানিয়েছেন। প্রধানমন্ত্রী তাঁর বাণীতে বলেছেন, মানসিক রোগে আক্রান্ত ব্যক্তির অধিকার ও সুযোগের সমতা বিধানে সরকার বদ্ধপরিকর। তিনি বলেন, সরকার মানসিক স্বাস্থ্যসেবাকে প্রাথমিক স্বাস্থ্যসেবার সঙ্গে সম্পৃক্ত করেছে। সূত্র-সংবাদ (পৃ.১,ক.৫), ইত্তেফাক (শেষ পৃ.,ক.৪), ফিনানশিয়াল এক্সপ্রেস (পৃ.৩,ক.৩), অবজারভার (পৃ.৪,ক.৪)।

৮। রাশিয়া ও বাংলাদেশ সুপ্রিম কোর্টের মধ্যে সহযোগিতা চুক্তি স্বাক্ষর

দেশের বিচার প্রশাসন ও মামলা ব্যবস্থাপনা পদ্ধতি আরও উন্নত করার লক্ষ্যে রাশিয়ার সুপ্রিম কোর্টের সঙ্গে সহযোগিতা চুক্তি স্বাক্ষর করেছে বাংলাদেশের সুপ্রিম কোর্ট। সুপ্রিম কোর্টে জাজেস লাউঞ্জের গতকাল (৯ অক্টোবর সোমবার) বাংলাদেশের ভারপ্রাপ্ত প্রধান বিচারপতি মো. আবদুল ওয়াহাব মিঞা ও রাশিয়ার সুপ্রিম কোর্টের প্রধান বিচারপতি ভায়্যাচেশলেভ এম. লেবদেভ চুক্তিতে সই করেন। পাঁচবছর মেয়াদি এ চুক্তির আওতায় দেশের উচ্চ আদালত ও অধস্তন আদালতের বিচারকগণ পর্যায়ক্রমে রাশিয়ায় প্রশিক্ষণের সুযোগ পাবেন। এর পাশাপাশি দুই দেশের বিচারকেরা পারস্পরিক অভিজ্ঞতা বিনিময় করবেন। সূত্র-প্রথম আলো (পৃ.৫,ক.২), জনকণ্ঠ (পৃ.১,ক.৬), ইত্তেফাক (পৃ.১৯,ক.১), ফিনানশিয়াল এক্সপ্রেস (পৃ.২,ক.৪)।

৯। মেডিকেল কলেজে ভর্তির ফল প্রকাশ

মেডিকেল কলেজসমূহে ভর্তি পরীক্ষার ফল গতকাল (৯ অক্টোবর সোমবার) সন্ধ্যায় প্রকাশ করা হয়েছে। এ বছর এমবিবিএস প্রথম বর্ষে ভর্তি হওয়ার জন্য ন্যূনতম ৪০ নম্বর পেয়েছেন মোট ৪১ হাজার ১৩২ জন ছাত্রছাত্রী। এরা সরকারি ও বেসরকারি মেডিকলে ভর্তি হতে পারবেন। দেশের ৩১টি সরকারি মেডিকেল কলেজে মোট আসন ৩ হাজার ৩১৮টি। ১৭ থেকে ২৮ অক্টোবর পর্যন্ত এ কলেজগুলোতে ভর্তি কার্যক্রম চলবে। এরপর বেসরকারি মেডিকেল কলেজে ভর্তি শুরু হবে। সূত্র-প্রথম আলো (পৃ.৫,ক.১), জনকণ্ঠ (শেষ পৃ.,ক.১), ফিনানশিয়াল এক্সপ্রেস (পৃ.৩,ক.৪), অবজারভার (পৃ.১০,ক.১)।

১০। **মাছের মূল্যস্তরে নীরব বিপ্লব : এফএও'র প্রতিবেদন**

বাংলাদেশের সব অঞ্চলে মাছের মূল্যস্তরে নীরব বিপ্লব সাধিত হয়েছে। এ খাত খুব দ্রুত বিকশিত হচ্ছে। এ মূল্যস্তরে পরিবর্তনের ক্ষেত্রে ৬০ শতাংশে রয়েছে মৎস্য খামার এবং প্রাকৃতিক সরবরাহ ব্যবস্থার প্রভাব। অবশিষ্ট ৪০ শতাংশে রয়েছে প্রধানত গ্রামীণ ও শহুরে পাইকারি, খুচরা ও অন্যান্য সরবরাহের অংশগুলোর প্রভাব। জাতিসংঘের খাদ্য ও কৃষি সংস্থার (এফএও) এক প্রতিবেদনে এসব তথ্য উঠে এসেছে। সংস্থাটি 'দ্য স্টেট অব ফুড অ্যান্ড অ্যাগ্রিকালচার' শীর্ষক প্রতিবেদনটি গতকাল (৯ অক্টোবর সোমবার) প্রকাশ করে। এফএও'র প্রতিবেদন অনুযায়ী বর্তমানে মিঠা পানির মাছ উৎপাদনে বিশ্বে বাংলাদেশের অবস্থান চতুর্থ। দেশের মানুষের প্রাণিজ আমিষের ৫৭ শতাংশ শুধু মাছ থেকেই মেটানো হয় বলে প্রতিবেদনে প্রকাশ। সূত্র-যুগান্তর (পৃ.১৫,ক.১)।

১১। **তিন সন্তানসহ জঙ্গি মারজানের বোনের আত্মসমর্পণ**

যশোরে জঙ্গি আস্তানায় শ্বাসরুদ্ধকর ১৫ ঘন্টার অভিযান শেষ হয়েছে। যশোর শহরের ঘোপ নওয়াপাড়া রোড এলাকার একটি বাড়িতে ঐ আস্তানায় গত ৮ অক্টোবর রোববার রাত ২টা থেকে শুরু হওয়া এ অভিযান গতকাল (৯ অক্টোবর সোমবার) বিকেল ৫টায় শেষ হয়। অভিযানে সন্দেহভাজন জঙ্গি হাফিজুর রহমান সাগর ওরফে মশিউর রহমানের স্ত্রী ও নব্য-জেএমবি'র প্রধান মারজানের বোন খোদেজা আক্তার তিন সন্তান নিয়ে আত্মসমর্পণ করেছেন। পরে ঐ বাড়ি থেকে ৩টি সুইসাইডাল ভেস্ট উদ্ধার করা হয়। আর অভিযানের দু'দিন আগেই পালিয়ে যায় নবগঠিত জেএমবি'র খুলনা অঞ্চলের নেতা হাফিজুর রহমান সাগর ওরফে মশিউর রহমান। সূত্র-জনকণ্ঠ (পৃ.১,ক.২), সংবাদ (পৃ.১,ক.২), এশিয়ান এজ (শেষ পৃ.,ক.১), বাংলাদেশ টুডে (শেষ পৃ.,ক.৪)।

সম্পাদকীয়

- ক. **সংবাদ** : বিশ্বব্যাংকের প্রতিবেদন অনুযায়ী বাংলাদেশে যুব সমাজের ৯ দশমিক ১ শতাংশই বেকার থাকার বিষয় তুলে ধরে উৎপাদনশীল খাতে কর্মসংস্থান বাড়াতে সরকারের অংশগ্রহণ আরও বাড়ানোর সুপারিশ।
- খ. **জনকণ্ঠ** : স্কুল প্রতিষ্ঠার ক্ষেত্রে গুণগতমান আর আইনি বিধানকে বিবেচনায় না রেখে ঢাকায় অনুমোদনহীন স্কুলের সংখ্যা বেড়ে যাওয়ায় এ ধরনের অনিয়মের বিরুদ্ধে ব্যবস্থা নেওয়ার আহ্বান।
- গ. **প্রথম আলো** : পটুয়াখালীর গলাচিপা উপজেলার রতনদি-তালতলী মাধ্যমিক বিদ্যালয়ের বিজ্ঞান ভবন সাত বছর ধরে পরিত্যক্ত থাকায় তা সংস্কারে জরুরিভিত্তিতে পদক্ষেপ নেওয়ার সুপারিশ।
- ঘ. **যুগান্তর, সমকাল, ইন্ডিপেনডেন্ট, নিউ নেশন** : ঢাকা বিশ্ববিদ্যালয়ের অধিভুক্ত সাত কলেজের পরীক্ষারফল নভেম্বর মাসের মধ্যে প্রকাশে ভারপ্রাপ্ত ভিসির আশ্বাস বাস্তবায়নে জাতীয় বিশ্ববিদ্যালয় ও ঢাকা বিশ্ববিদ্যালয় কর্তৃপক্ষকে আন্তরিক হওয়ার আহ্বান।
- ঙ. **ইন্ডিপেনডেন্ট** : রাজশাহী, নাটোর, নওগাঁ এবং চাঁপাইনবাবগঞ্জে বন্যায় ক্ষতিগ্রস্ত প্রায় ৫৫ হাজার কৃষকের পুনর্বাসনের ব্যবস্থা করার সুপারিশ।
- চ. **ডেইলি সান** : বাংলাদেশে আশ্রিত রোহিঙ্গা জনগোষ্ঠীর প্রভাবে দেশের সামাজিক ও প্রাকৃতিক ভারসাম্যে বিরূপ প্রভাব পড়ার আশঙ্কা করে রোহিঙ্গাদের দ্রুত প্রত্যাভাসনের ব্যবস্থা করার ওপর গুরুত্বারোপ।
- ছ. **নিউজ টুডে** : দেশের মোট শিক্ষার্থীর মাত্র ১০ শতাংশ কারিগরি ও বৃত্তিমূলক শিক্ষায় জড়িত থাকায় দক্ষ মানবসম্পদ গড়ে তুলতে এ সংখ্যা আরও বাড়ানোর আহ্বান।
- জ. **নিউ এজ** : যানবাহনে হাইড্রোলিক হর্ন ব্যবহার বন্ধে আইনশৃঙ্খলা রক্ষাকারী বাহিনীকে কঠোর পদক্ষেপ নেওয়ার সুপারিশ করে সম্পাদকীয় প্রকাশ।

উপসম্পাদকীয়

ভোরের কাগজ পত্রিকায় প্রকাশিত কলামে উল্লেখ করা হয়েছে, মায়ানমারের নির্মম আচরণের বিরুদ্ধে প্রধানমন্ত্রী শেখ হাসিনা কৌশল এবং নীতিতে বাংলাদেশকে বিশ্ব পরিসরে মানবিক ও যৌক্তিক যে অবস্থানে নিয়ে গেলেন, তা বিশ্বে সমাদৃত হচ্ছে ।

নিবন্ধ ও ফিচার

সংবাদ পত্রিকায় প্রকাশিত ‘কর্মক্ষেত্রে জটিলতা ও বিষণ্ণতা’ শিরোনামের নিবন্ধে অভিমত প্রকাশ করা হয়েছে, কর্মীর মনের উৎকর্ষ যেমন কাজের পরিবেশ উন্নত করে, তেমনি চাপমুক্ত উন্নত কর্মপরিবেশ কর্মীর দক্ষতা বাড়ায়, উৎপাদনে অগ্রগণ্য ভূমিকা রাখে ।

#

খাদীজা/ফাহিমা/মরজিনা/রশীদ/তানিয়া/২০১৭/৯.০০ঘণ্টা